

四庫全書

集部

欽定四庫全書

集部

石倉歷代詩選卷二百八十二

詳校官庶吉士<sub>臣</sub>范逢恩

侍讀<sub>臣</sub>孫球覆勘

總校官進士<sub>臣</sub>朱鈐

校對官主事<sub>臣</sub>張慎和

謄錄監生<sub>臣</sub>王旭昇

欽定四庫全書

石倉歷代詩選卷一百八十一

明 曹學佺 編

明詩初集一

陶安

送呂經歷

姑孰古藩翰溪山繞城郭出鎮遣重臣分符荷侯爵黃  
堂清晝閒蓮香藹賓幕美茲南土彥聲名素昭灼嘉言

吐清婉奇搜破冥漠簡牘日豈無談笑為裁度貞姿澗  
畔松高情雲表鶴流光何荏苒新霜點華髮解篆促歸  
期遙憶舊林壑江流渺孤篷春風柳花落才猷時所慕  
行矣沾殊渥壯心老不渝雲路參寥廓

寄題依綠亭

太平縣  
湯育堂

黃山衍餘秀雲巒結層城溪泉抱林麓蒼瑩有餘清  
育堂賢主人締此松竹盟作亭宅幽勝闢園蒔芳榮波光  
照簾几天影涵空明依綠意何如聊以濯吾纓漢水鴨

頭色錦江春碧晴向來遠遊處恍惚當軒楹仰視金芙蓉  
千峯鬱崢嶸丹崖浮紫氣上接白玉京仙人縈雲裾  
下顧如有情翩翩鶴書來閉戶懶出迎俛首玩澄泚但  
覺軒冕輕機心晏然息肯使鷗鷺驚洗耳慕高躅深居  
淡無營

夜行至香魚館

在滄州  
鹽山縣

目送寒日墜暮色變蒼黃近顧已昏冥前店安可望遊  
子且宵征苦恨晝不長雪深迷古道車陷心愈忙缺月

未出時粲然衆星光四無雞犬聲瓊田白茫茫忽逢人  
夜語為我指康莊漸至香魚館叩門燈照床主翁起迎  
勞飲以壺中漿笑問來何遲吹火煮糗糧因知造物心  
不使罹害傷命途此可卜力善何能量

述寓

長明道  
書院作

夙志慕前矩琴趣愧難續棄米曾賦歸云何效奔逐慈  
親日向老無以報鞠育明經不取士奉養心未足攜家  
客秦淮蒼苔蔽荒屋年豐公廩虛半載不沾祿妻子樂

從儉朝夕共饘粥母心愛兩孫每食分鼎肉自憐頭上巾興到無酒漉怡然坐窓下一笑對秋菊

秋風辭送梁生

涼颿蕩平野遠送賓鴻翔蕭蕭西北來草木忽變黃不  
惜草木衰寒入客子裳曉窓凋鬢影夜堂搖燭光值此  
素節宴令人懷故鄉援琴賦將歸苦雨菊有芳盼望掃  
積陰下土見太陽明當吹羽翰高飛戾穹蒼

九日登高翠微亭分韻得滿字

山川甚雄麗積雨為磨澣天開秋氣清遊娛共蕭散石  
徑接巉巖興到行不懶微霜護新晴杲日送餘暖層嶺  
躡高寒境勝世所罕蒼茫四無極自恨目力短危亭基  
蘚殘麋鹿荒町疇居然龍虎勢城郭在平坦崇阿弔離  
宮老木蔭僧館松雲引徐步蘭露入清盥況當重九節  
野菊相留欸賓朋笑語間文理謝雕纂好風襲尊俎幽  
鳥啖絲管人生光景速每恨樂事緩嘉會幸一逢何辭  
累觴滿



登舜江樓得換字韻

承平十八載河海既清晏越東在遐荒武備奉宸斷股肱二三臣坐鎮防變亂網羅得名士兵機授成算下馬舜水濱官吏服能幹寸心每勤勞百姓免愁嘆與客閒片時登樓愛奇觀憑欄出樹杪振衣在天半諸峰繞城邑萬室夾江岸鯨濤息狂沸龍泉入清玩霜晴風日佳暢望百慮散因憶京華春盃酒曾共案別來會聚難轉眼年歲換旅中得追隨相顧發一粲

癸卯閏三月十九日奉旨代祠寶公遇環中  
子於山中送余出寺余止之環中子曰不

出圓悟關因續為句

不出圓悟關已入清淨境長松閉虛巖閒坐弔孤影我  
行寶珠林聞君萬緣屏意將叩玄奧未敢輒呼警童子  
倚馬睡侍卒息馳騁飛亭攬空翠木末潮萬頃恍然忽  
我即握手語高嶺脫屣人世外豁若春夢醒霏霞棲浹  
寥幽雲陰蒼冷萬葉發遠香半天覺清迴山水多勝事

興到暫同領嘉君匪逃儒默几聊習靜形迹若異途一  
理內自省樓閣起太空先見常炯炯沸海指龍濤神光  
破溟滓惜無浮生閒共此白晝永下堦踏重蘚倚欄瞰  
方井天地一逆旅誰宜歎萍梗送客臨虎溪餘情詠佳  
景何當從之遊慰此心耿耿

次韻劉彥炳典籤感秋

我本隱逸人手種籬菊黃養真亦好道忽已五十霜夜  
涼不能寐稽古燈在床天明驅馬出秋興滿江鄉

偶述

粵茲古黃國麟史昔見書開郡領三邑環境千里餘淮  
漢錯犬牙大江倚郭郭亦有邾子城近在東北隅岡巒  
起千疊蒼峭夾井廬頗訝前朝意乃視遐壤如元之既  
守郡子瞻亦謫居竹樓冬聽雪赤壁夜憑虛適為此地  
韋因之作名區至今江山間光彩被禽魚我才愧庸陋  
來寓情思舒兵後撫瘡痍野外墾荒蕪努力礪名節庶  
不負所需

新晴有感

今日復何日見此天氣晴上帝憫下土欲遂苗稼生民  
久苦陰晦再遇白日明愧我初守郡惠政未能行頗聞  
近年來差繇事匪輕三時勤農務冬藏不滿籩赤子空  
嗷嗷使我淚如傾仰視蒼旻高無雲蔽太清吾當訴真  
宰早致天下平

書事三十韻

離家仲冬望泝江至鄂渚淒風裂重裘大雪慘行旅蹉

蛇歲華晏洲邊感鸚鵡今年春二月璽書命守土兩旬  
抵黃州又值連月雨披榛古瓦塲誅茅創解宇四招復  
業民瘡殘必摩撫事簡雖得暇懷國鬱心腑夢登閣道  
上隔水不得語覺後山月西孤影在荒堵新晴雲霧捲  
南方早炎暑夏衣家未寄晝汗生髀股對客捫虱談癢  
多翻成苦土無絺綌賣間有乏資與空存麻城名不見  
製白紵赤日爍間閭卉服多困屢一物差可意美竹產  
村塢削皮為枕簟纖巧類織組涼光泛琉璃病後難寢

處此身不足惜所願六事舉閔茲烽燹餘民命滿荆楚  
可恠近日來船兵忽暴禦快槳躡洪濤劫貨殺物主登  
岸拆郵亭伏莽襲商賈巴河遇三人投之急流去一人  
浮水還赤體無寸縷疆域幸開闢道路仍齟齬偶逢使  
者歸封書聞政府收陳骨鯁言天高聽常俯踪跡懸幽  
遠庶效涓埃補

江色

竹屋晨啟闕江色直飛入空碧壓几案陰陰四壁濕玻

卷一百八十一  
璿作天地冷然手可挹萬象隨升降元氣動呼吸臨岸  
步觀漲石堦沒千級岷巴與湘漢衆水大會集合流東  
北去海水亦起立

秋夜

秋分氣初爽燈火新照夜蟋蟀在我宇鹿豕過簷下商  
飈戛松竹聲樂殷風雅旅人空嘆室聽此稍慰藉四時  
寒暑代秋淒殊可訝山川變寂寥草木動衰謝況乃尚  
殊方未得稅星駕自非強寬夷鬱結莫傾寫命途有或



然意欲問造化蒼然嘿無語列緯芒彩射漫漫未能旦  
天地一邱舍

夢覺

夢覺山雨來萬點擊虛瓦泠泠玉磬音墮我羈枕下回  
颺撼松濤曲奏迭高雅此身卧鉤天傲睨洞庭野造物  
慙孤寂作意為陶寫殘夜破幽閒心耳俱洒洒清吟答  
洪調勿謂和者寡

送秦君用

萬山丹翠浮楚天，熊蹲龍奔隱雲煙。  
長沙零陵相後先，一水走碧雄瀆川。  
地饒黍稷麻麥田，瘴不為癘暑不煎。  
蘓溪僻境民受廛，蜂屯魚貫紛牽連。  
草荒公廨屋數椽，鼓角聲撼天南邊。  
秦君下馬藍袂鮮，官閒晝永如神仙。  
令嚴兵伍米棒懸，平蕪月白大熟眠。  
出自富家真象賢，寶視經書唾視錢。  
平生周急心所便，況乃募粟綸音宣。  
堯湯曾遇水旱愆，從古有饑無此年。  
聞之殊覺心惻然，我發我庾實且堅。  
瓊粳滿載江上船，順流不日經淮堧。

鵲形久病成甦痊報以美秩天官銓御煤香濕黃錦牋  
手彈冠塵理腰纏春風溪亭飛柳綿銀箏侑酒喧離筵  
帆開水驛弓控弦洞庭浪噴蛟魚涎巍峯隱隱飛鴈旋  
岸口迂卒森戈鋌峒徭帖服無警傳滿簾日色薰蘭荃  
公田飯飽跨錦韉入城為訪濂溪泉

送文元榮游學杭城

錢塘繁華甲天下雨霽湖山翠如畫朱樓人醉綺羅春  
細帙誰諳燈火夜一時見君真拔俗千里尋師遙稅駕

生長富貴厭膏粱，嚼經書如膾炙。采鳳鳴陽出丹穴，  
蒼隼凌秋飛太華。柏垣繡斧風烈存椿府，屏車光寵亞  
名賢。奕世妙有傳赤箭，南金貴無價。閉門功比螢雪勤，  
入室氣與芝蘭化。自喜高懷孤月朗，頗厭辨口懸河瀉。  
詞林驚見爛春葩，聖田侍穫豐秋稼。寸心莫逐汗漫場，  
萬里當會神明舍。客中昆弟共綢繆，歲杪杯盤聊慰藉。  
胥濤海口撼風霆，吳阜城心起臺榭。蓮衣紅映歌艇筵，  
柳絲青拂鈿車帕。遽令此志生蠱惑，何異無知歸罟獲。

直須意氣慎交遊而今習俗多浮詐策勲行矣當盛年  
展卷朗然了清暇詔書今日科制復文星徹曉光芒射  
相期才器擢明廷早植棟梁成大厦春風吹上杏花枝  
天衢飛鞚青雲靶

至正戊子下第南歸與同貢黃章仲珍雷燧景  
陽同舟仲珍賦詩因走筆次韻

鳳城酒美燕姬歌禁花紅飄金水河雨香翠島春晝暖  
魚龍陸海揚風波天門咫尺不可到奈此颼摧風翼何

時乎未至應有待壯年不必傷蹉跎君看松柏成大材  
歷歲雪霜誰見過拂衣南出指歸路回首京闕山嵯峨  
日高原頭紅霧散潮平沽口青銅磨牽船泝流狂風逆  
登車避閘飛塵多黃樓憑河遠眺望身如冥鴻超網羅  
客途笑語浣羈思詞鋒捷出如揮戈天生人才必用世  
豈無文藻宣金科鸞臺鳳閣總華要不然玉署聯鳴珂  
丈夫小挫未為辱正氣耿耿非有它匣中古硯助神變  
銅蟾飽水手屢摩隨身亦有勲業鏡依然照我顏色酡

與君今日動高興買酒共酌澆天和

送僧芳蘭谷住持明招寺

幽蘭之生在深谷詎以無人而不芳鉢盂朝采墜露飲  
青蓮蒼筤停馨香谷中空明若圓鏡須彌環海日月光  
傲睨天台高鬱蒼五百痴衲岩穴藏小乘留戀不死鄉  
何緣比肩大法王後代演經談渺茫天花紛飛七寶床  
遠窺正覺如望洋伊誰面壁文字忘獨棲金華山滿房  
定中趺坐歲月長聲音色相等妄幻自謂學佛非荒唐

水壺石筍出雲漢飄然凌虛觀十方龍蟠法界氣紫黃  
渡杯如電江聲涼偶然乞得袈裟地已被東萊建道場  
東萊先隴在武義非為薦福生天堂正緣人家有興廢  
寺觀經久願力强金坊寶閣鐘鼓震馬鬣肯使樵蕪傷  
我思儒門經濟業發育萬物隨翕張存心養性禪所宗  
浩氣剛大仙揣量空玄行說原有自勸人作善來百祥  
雖云離倫絕世故恃此禮樂扶綱常何必火書廬其居  
然後鄒魯文教昌東萊雲車自天降撫掌應笑吾言狂



送王克敏安豐錄事兼簡元中宣差

同入南宮試逡巡愧不才都城留字別昇郡寄書來寒  
雪森松檜春陽活草萊長官煩問訊東楚憶持杯

送易長卿

南仕衣難綠東歸鬢欲皤儒流淹贊佐官事輟吟哦春  
動芝蘭砌秋澄菡萏波長官前進士降揖禮容多

其二

椿庭山不老棣館祿方新顧我知名久逢君問話親琴

書藏舊物碑畫撫奇珍煙浪垂虹晚東吳見故人

自大關至小關

山路多盤折無勞怨苦辛深岩不見日疎雪幾經旬衣  
薄肌生粟輪馳眼翳塵想應慈母意日日望行人

送人赴幕職

浙西第一縣幕下總諸曹興逐雲山遠心忘案牘勞寫  
詩嘲月兔呼酒擘霜螯應有安民策方知贊畫高

送人赴浙東

處儉愛蔬淡嗜經如撫甜香煤浮硯沼短燭照書簾鮎  
岸漲春水鱖潮沃夜蟾十年交誼厚兩地別懷添

幽居雜興次監郡韻

幽居無限好托興在雲林蘭氣山軒靜槐陰石逕深霜  
螯肥斫玉臘酒滿浮金對境皆成樂逍遙物外心

又

幽居無限好松竹翠成林放鶴高天濶尋仙古洞深棲  
身三畝宅絕念四知金舒卷隨時異非無愛國心

又

幽居無限好猿鳥語高林歲月催人速煙霞得趣深  
葱裾曾織翠荔帶已圍金富貴尋常事安能動此心

又

幽居無限好流水繞疎林教子書囊富留賓酒盞深  
閒添詩裏畫儉有俸餘金石上閒琴操悠然太古心

又

幽居無限好爽氣挹蒼林採藥穿雲遠烹茶汲井深  
牀

存題卷筆筭出嚮書金時有馴鷗狎忘機靜此心

又

幽居無限好倦鳥喜投林野韻思高古公文厭刻深  
鼎彝三代器酒食二疏金目送飛雲遠還存物外心

病後

飲水味吾易秋江亦讓清寒初身欲蟄病後髮重生  
乞米親書帖淹蘊未滿罌高天風露潔庭菊晚含英

秦淮寓舍

官久忘羈思門幽類隱居  
犧圖天地象鮒壁帝王書  
秋徑霜前菊朝盤雨後蔬  
西風吹短髮歸夢鴈來初

習靜

雙閨曉未闌一天秋氣清  
雨溪分硯水風木厭瓢聲  
習靜調冲氣耽書老此生  
上官詢近候片語悉真情

晚晴

江上秋陰薄晚風生樹顛  
高塵捲蒼靄歸鳥度青天  
牧馬平蕪野捕魚斜日船  
千村新稻熟茅屋起炊煙

自效

出入兵戎裏，揮毫代執戈。  
病餘身易老，日短事偏多。  
山月出青靄，江風生白波。  
心專圖報效，才薄愧蹉跎。

寒夜

書几殘燈在，房櫳清夜徂。  
高鴻叫雲冷，明月照人孤。  
銀箭遙傳漏，紅金不到爐。  
擁衾纔瞑目，飛夢滿江湖。

寄豐叔良

見說郊居好，行吟野趣多。  
溪魚曾上活，山鳥酒邊歌。  
雪

屋炊紅米秋江老翠蛾幾回時序換奈此別離何

又

阿咸九月到寄我尺書看盡日不釋手空江頻倚欄鄉  
山微雨外客夢一窓寒遙想林泉勝無憂寢食安

省中夜直

長廊羣椽散徙者煮茶供寒雨連深夜清燈照病容明  
生白雪壁響度順風鐘松火爐中燼神清睡不濃

櫓港



昔年遊此地市井簇人煙水驛官船鼓花林酒閣絃重  
來盡蘆渚何異變桑田回望礪磯在臨流獨悵然

繁昌

午過繁昌邑山鷄誤近郊戰場枯白骨行徑老黃茅官  
廨新臨水人家類結巢鳳凰山獨好寒翠動吟嘲

石窩

飛巖立萬石正面俯清波心喜到佳處吾將營此窩江  
蕪煙浩蕩野竹雪婆婆凍鰈相看久忘機意共多

荻港

空垣霜蘚濕雞犬四無聞  
恠樹作人立斷碑經火焚  
溝魚爭雪水山鳥唼朝昕  
信步不知處風林樵運斤

過池陽

一錢有華胄三載守名邦  
我偶經秋浦無由共夜窓  
煙雲浮遠樹雪月照空江  
倚棹西南去應慚過鴈雙

題池口驛

孤帆向江漢四野息風塵  
忽見滿山雪因之懷故人  
滄

波遙注海凍樹暗藏春他日重來處桑麻雨露新

次安慶

年餘罷爭戰地美類承平茅屋添新戶江流繞舊城關  
津遮道問將帥出郊迎天晚煙波濶催行月未明

泊巴河

蘭溪行過後迤邐到巴河江狹無磯險沙平有港多鄰  
舟同永夜漁火照寒波獨惜年華宴其如道遠何

晚至武昌

行至二十日來臨鸚鵡洲環城屯虎旅伐鼓衛龍舟新  
月羞初夜寒雲黯一樓波間燈影密穩泊且無憂

黃岡寓所

霧雨一城暗梨花三月天空梁春蟻墮疎壁暮蚊穿草  
密藏枯井苔荒蝕斷磚開門山色好飛翠落吟箋

郡寓偶成

江月簫聲遠城春竹色斑天文鵲尾次地險虎頭關綰  
綬此為郡結茅先對山雨晴聞布穀闢草未能閒

雨過

雨過山添色推窗翠撲衣  
秧隨新水長蝶趁落花飛  
江近簷頭掛春從客裏歸  
沙乾聊可步倚杖綠陰肥

追悶

數日情懷惡連宵風雨多  
憂來成展轉事至罷吟哦  
園樹肥椒子煙叢長薜蘿  
一春不對鏡正恐鬢絲皤

縱步

傍市人家聚瀕江草徑遙  
燕尋曾到屋魚候未來潮  
訪

友聊乘興扶筇直過橋晚峰煙外見重疊翠如澆

遣興

鵲立疎晨仗蜂喧聚晚衙寓居多澤水吾分合漁槎未  
病常儲藥無眠減啜茶從人笑潘岳垂老更栽花

湖鄉

淝水新無警湖鄉頗有年稻田驅夜豕蓮蕩捕秋鰕邏  
卒黃茅戍歸人白板船數家依綠樹斜日照炊煙

寄呈從兄松雲翁

別兄二載久介壽六旬餘清健如強日蕭閒守故居薄  
田供伏臘稚子業詩書小弟亦垂老還思到里間

九月朔得阿晟所寄藥物

人自金陵至兒封藥物來家書千里達旅況一時開病  
想丹砂鼎緣慳玉露杯喜看菹醢列鄉味出瓶壘

九月七日雨

兩月晴明久昨宵風雨聲寒催秋色老病怯袷衣輕故  
壘低雲黑荒衢濕蔓紫重陽時節近客裏助淒清

秋夜

青燈對無語  
白日透虛櫺  
乍冷壁虫響  
向風山葉零  
更長無久睡  
意到索遺經  
心境有餘寂  
秋聲自厭聽

人生

人生在天地  
隨寓即為家  
著處燕營壘  
行踪鶴印沙  
征衫霑野露  
倩隱笑溪花  
還勝陽山令  
篁茅障海涯

晚風

暮秋連日熱  
向晚大風寒  
變態如翻手  
衰容怯倚欄  
降



霜中氣應吹月上雲端木葉蕭蕭脫淒聲接夜闌

夜永

山深無刻漏夜永不知更窻白只疑旦月斜猶未明離人江北住華髮枕間生孤館此懷寂斷鴻何處聲

雨館偶成

山中三日雨榻上一種寒野暝雲吞樹溪回雪舞湍孤飛迷白鳥數點淡蒼巒閉戶空林下蕭條意強寬

泊松山湖

風逆湖波湧維舟傍淺沙松山雙石巘茅舍幾人家霜  
樹明丹葉寒蔬長綠芽客鄉今夜月伴我宿蘆花

發松山湖

朝雨止還作征人去復留輕雲微放日近午始行舟雙  
鳥煙波繞重湖晝夜流白鷗飛適意擾擾見渠羞

官廨北澗偶步

碧澗依山麓蒼松掛野藤泉清見魚泳磴絕少人登龍  
井苔封甃鳬田草沒塍舊時豐邑屋廢址接丘陵

聞除代者及召還之命

年殘動歸思客至報除書  
海內招文學淮南起謫居  
故人存有幾短髮病來疎  
天朗朝陽出能無照曳裾

臘八日發桐城

邑人生悵快送別郭東門  
凍木知春早晴風捲霧昏  
石橋分古道野燒露新痕  
行處山農說留聲到子孫

入境

船頭難未唱已過數重磯  
原野新浮霽兒童遠候歸  
好

山如故友高鳥笑征衣指顧龍灣近無勞嘆久違

采石晚渡

殘霞遠樹水雲中淮甸江鄉有路通沙影分開晴浪白  
櫓聲搖落夕陽紅風前宿鷺投疎葦岸上征人望短篷  
幸有蛾眉解迎客無勞更嘆暮途窮

送劉仲彬

天塹僅同衣帶水霎時搖過渡頭船半簾霜月留孤館  
兩岸江淮共一天鏡裏年華催綠鬢屋西山色擁青氊

月蛾裁得緋衫就桂子風高待著鞭

送奉使宣撫護都右丞

時過  
太平

面承天語出京華春滿江南百萬家  
碧落雲開懸月鏡青天霜晚避雷車  
恤刑宛合虞朝典道遠如乘漢使槎  
原隰咨諏王事畢懽浮玉色見褒嘉

探梅

東君消息乍來時訪問江頭慰所思  
踏雪且行新霽路向陽應有半開枝  
遙知暖意回苔榦驚喜寒香度竹籬

又恐重來花爛熳細看蓓蕾最相宜

登高凌歊臺

粉黛香銷輦路荒雨晴菊意媚重陽  
長江落木秋無際短帽西風鬢有霜  
千嶂馬騰環重鎮萬松龍舞蔭禪房  
英雄多被繁華誤蜀雪湘雲舊恨長

題青田劉氏園亭詩卷

湖光近接少微星玄鶴飛來洞不扃  
天雨好花開桂苑地栽脩竹似蘭亭  
文魚躍水憑欄看黃鳥吟春隔樹聽

江左芹香縱留客故山歸夢繞銀屏

歲暮即事

慰藉情懷臘酒香光陰背我去堂堂驛梅初破兩三蘂  
官厯惟餘五六行斷送殘年多雨雪逢迎老境是星霜  
街衢擊鼓驅儼出却喜邦民共樂康

觀瀾亭

江頭下馬俯驚湍懶把嬌娥作意看鯨背風煙詩客遠  
酒邊花木醉翁歡日斜淮浦漁歌近秋老吳天鴈字寒

萬頃銀河生脚底乘槎何似倚欄杆

三湖

三澤茫茫一碧連白蘋風起棹歌傳樹頭煙浪浮沈日  
水底星河上下天葦長新沙留鴈夢草腥殘箔濕蛟涎  
何當結屋瓊瑤窟買取臨隄二頃田

嵩溪詩會

亭樹陰中共倚欄春雲藹藹出毫端嵩泉香透銀箋滑  
溪月清分雪枕寒官久似嫌龜紐重客來寧惜蟻觴乾



南歸衣拂京塵污喜見驪珠落玉盤

秋日述懷

一羶雖冷寄名邦却愧辭巢燕子雙  
風送霜華來短鬢秋隨鴈影落疎窻  
甘霖透地晴觀稼缺月當樓夜聽江  
佳客相過常滿座清貧每欠酒盈缸

送賀憲史赴廣東

英才適用出儒庠自喜參承繡斧光  
粵雪夜寒飛海嶠巒煙曉霽避風霜  
紵袍清挹芙蓉水椰椀香凝荔子漿

北望鳳臺真捷徑先將文采動遐荒

送姚秀才歸桃源

客路隨身一束書凌雲氣似馬相如孤燈江館厭紅粟  
三月淮鄉多白魚遇世豈容淹楚璞到家惟喜奉潘輿  
桃源雨霽春如錦更望瓊林欲駐車

館中山朝元觀作

自出徵租五十日朝元閣下首頻搔客中喜遇故鄉友  
秋後自憐疏布袍大火流空望霖雨西風入湖飛雪濤

扁舟又欲渡江去  
桂影滿身明月高

送鐵元起監歸州

川口通衢熊繹城  
兒童竹馬走相迎  
三巴草樹春浮動  
萬舸風濤雨蕩平  
晚市炊煙連白帝  
曉山旭日射紅旌  
政成當入蘭臺選  
熟路霜蹄上玉京

送戴生

姑孰亭前綠藻肥  
會稽山上白雲飛  
四郊兵氣頻聞警  
一榻燈光只夢歸  
舟子爭潮喧熟路  
海魚脩饌奉重闈

姚江在望渾非遠肯踏梭船訪釣磯

岳王墓

十二金牌發帝宮儘憑讒舌害元功  
君臣樂土偷安遂父子邊庭屬望空  
莫掩青山千載恨常懸白日寸心忠  
英靈只在棲霞嶺塚樹無枝偃北風

寓姑蘓半塘寺

息程來借贊公房暫泊扁舟向石塘  
苔暹煙蘿浮竹翠風簷花雨發天香  
僧依法座持仙梵人叩禪機入道場

明訪虎丘應不遠雲邊樓閣擁青蒼

虎丘

海擁危峯翠拂天  
瘞來池劍化蜿蜒  
樓臺隱映王珣宅  
樹石荒涼陸羽泉  
古塚月明無踞虎  
芳林春盡有啼鵲  
名山勝境關情處  
祇為尋登數繫船

毘陵道中

孤帆斜日領舟行  
遠道無山為送迎  
沙店疎籬堪問酒  
煙村高樹不聞鶯  
一灣野水鷗波靜  
到處蘋香客思清

莫嘆飛蓬類踪跡成名自昔在書生

秋夜懷友寄秦伯容太守等

夜永懷人頻有夢日來作郡到無為  
江淮漸見干戈息草木先承雨露滋  
家累相忘勤國事郊行遍問撫民瘼  
西風依舊秋容好未暇登高醉片時

又

我憶西廳劉博士手提判筆坐黃堂  
意高自與青天遠事簡偏知白晝長  
夢裏江環儀鳳閣望中草長臥龍岡

人生出處皆由命先試奇才定一方

贈鎮撫田無禽

鉄馬牙旗將帥才捷書頻到鳳凰臺  
陣雲護壘軍容整塞月窺窓旅夢回  
橫槊賦詩江海靜揮觴酌客野梅開  
囊書讀罷憑高閣溪嶂秋清紫鴈來

送別

將營戰甲氣橫秋幕府衣冠坐運籌  
天下義師同滅楚蜀中帝胄已興劉  
星軺將命來華省錦誥覃恩遍列侯

歸向轅門宣主德滿城懽意動貔貅

憶別

七年同在省東廳回首征途夜戴星南國遠遊資幕府  
西山爽氣挹江亭壯年報國心常赤賢主知人眼為青  
鴻鴈未秋音信少每思佳語似蘭馨

寄吳左丞

長沙爵邑舊鄱君曾住臨川壯武勲帝室遂能賓百粵  
王孫今復將三軍火旗鉄馬晴觀陣玉帳銀燈夜話文



北望金陵作鄉土鍾山佳處有飛雲

送朱允升

年年應召赴秦淮此會留連百日偕  
王室議成新制作客憲飛動舊情懷  
未霜荷葉迎潮棹初月梅花映雪齋  
更約相逢多勝事御溝垂柳拂春街

萬戶趙禎見余訪單憲使不遇之作賡歌四章  
雨中來謁用韻以答

驚見連篇錦繡文營中將校罕逢君  
投壺清致祭征虜

卷二 百八十一  
執戟多年揚子雲銀甲行穿江路柳丹心每效野人片  
一窻細雨初相識清馥如蘭滿室薰

秦淮

古云天子氣佳哉誰使秦皇鑿地開銀漢西流環數曲  
紫垣中起面三台每逢霖雨添黃潦更染春漪似綠苔  
因此金陵都會勝兩隄煙柳陰樓臺

秋館書事

多年草樹未芟除野豕山麀走傍廬三五吏曹來捧牘

歌斜客枕罷觀書  
秋江潮湧霜飛晚  
暮靄鴻征月上初  
木落風高生遠興  
思歸意不在鱸魚

新春同遊蔣山即席賦

時維正月初五日  
人在鍾山第一峰  
石磴輕風隨去馬  
寶珠佳氣結飛龍  
四方文物成嘉會  
六代京都覽舊蹤  
我亦追隨冠蓋後  
未容歸隱撫孤松

四皓奕圖

安劉事畢返林丘  
當局機心老未休  
松下樵夫應暗笑

先輸一着與留侯

次韻溪居

暖天漲霧結春陰  
花片隨波半欲沈  
病鶴林疎飛不起  
却輸黃鳥占高林

早行

月光斜墜樹淒迷  
山路崎嶇信馬蹄  
撲面霜風行十里  
村墟漸近始聞雞

旅夜聞雨

夜雨巡簷瀉瀑聲  
窓虛燈暗旅魂驚  
思家非是無歸夢  
自信離人夢不成

初歸

幽薊歸來鬢若絲  
故園三徑草離離  
慰人猶有籬邊菊  
強吐秋光滿舊枝

秋山曙色圖

樹含曉色護林巒  
重露如嵐滴翠寒  
猿鳥儘逢山叟慣  
未嘗驚恠竹皮冠

懷友

別來消息久無聞  
目斷江東只見雲  
遙想蘋洲吟咏處  
寸心常繫白鷗羣

送何令歸江右

故山猿鶴正相招  
非是淵明懶折腰  
想見章江門外柳  
待君歸繫木蘭橈

過田家

綠藏芳屋樹無花  
穀浸田疇已出芽  
正是春蚕成熟後

不聞籬落響繰車

舟中望虎丘

青蔥殿塔倚斜曛  
樹色嵐光杳莫分  
今夜名山當借宿  
不教閒却半床雲

墨竹

煙雨濛濛翠影雙  
滿林清氣逼寒江  
雲間禁直青綾夜  
一片秋聲起瑣窓

石倉歷代詩選卷二百八十一



欽定四庫全書

石倉歷代詩選卷二百八十二

明 曹學佺 編

明詩初集二

張以寧

送重峰阮子敬南還

君家重峰下我家大溪頭  
君家門前水我家門前流  
我行久別家思憶故鄉水  
何況故鄉人相見六千里  
十年

在揚州五年在京城不見故鄉人見君難為情見君情  
尚爾別君奈何許送君遽不堪憶君良獨苦君歸過溪  
上為問水中魚別時魚尾赤別後今何如

題海陵石仲銘所藏淵明歸隱圖

昔無劉豫州隆中老諸葛所以陶彭澤歸興不可遏凌  
歆讌功臣旌旗蔽輶輅一壺從杖藜獨視天壤濶風吹  
黃金花南山在我閨蕭條蓬門秋稚子候明發豈知英  
雄人有志不得豁高詠荆軻篇颯然動毛髮

綱齋為張景思總管賦

煌煌五色錦出自天孫機河漢濯文彩雲霞光陸離裁  
之古刀尺被服禮所宜終焉不自衒衣裝以尚之白賁  
遵聖訓含章示臣規豈乏美在中詎求衆人知問茲誰  
為歟君子有令儀承家世袞繡保已猶布韋盛德詎終  
閔蘊玉光逾輝願言垂昭代敝我舜裳衣

遊句容同林景和縣尹子尚規登僧伽塔賦

嵯峨崇明塔拔地一千丈我攀青雲梯條到飛鳥上微

風韻金鐸初日麗銀榜維時十月交葉脫天宇曠羣山  
東南奔平川疊波浪雲間三茅峰環立儼相向碧瓦浮  
鱗鱗茲邑亦云壯雞鳴四關開攘攘異得喪塔中宴坐  
僊憐汝在塵埃古時登臨人今者亦何往俯觀世蜉蝣  
仰歎彼龍象乃知崑崙巔可以小穹壤同遊皆雋英超  
遙寄心賞霜颿天際來毛髮颯森爽太白去千年吾何  
獨惆悵

送楊士傑學士代祀闕里分題得硯井臺

清廟歸古城論堂儼遺井色淨涵市槐芳流泛壇杏經  
文曩刪述墨沼發先河源分鴻濛深澤配穹壤未茲行  
弭英盪汲古用脩綆仰止千載心月明湛秋景

峨眉亭

白酒雙銀餅獨酌峨眉亭不見謫仙人但見三山青秋  
色淮上來蒼然滿雲汀欲將五十絃彈與蛟龍聽

題子猷訪戴圖

平生戴隱居破琴還雲嶠亦有愛竹人翛然可同調雲

溪夜回舟未見心已了乾坤澹虛白吾方領其妙

題江仲暹聽鶴亭

仙鶴在人世長鳴思遠空有人秋水上海杖月明中玉  
樹三更露銀河萬里風徘徊意無極遲爾出樊籠

送同年江學庭弟學文歸建昌

白髮江夫子青雲信獨稀故人長北望令弟又南歸庭  
樹烏羣喜江帆雁獨飛東湖春柳色到日上君衣

送侯邦彥自南譙遊建業

君向金陵去雲帆百尺懸杯搖江色裏詩墮菊花前  
涂水明秋月鐘山起暮煙鳳臺逢李白一為問青天

九江廟

遺臺上古城劒氣夜崢嶸天地英雄恨春秋父老情  
蜀江來楚盡涂水近江平往事何勞問長陵草自生

夜飲蔣師文齋館

故人相與醉虛幌坐來清月色宛在地鐘聲忽滿城  
都將千載意併作異鄉情若買青山得相携歲晚行

浙江

山從天目下潮到富陽迴此地扁舟去吾生幾度來林  
紅晚日落江白雨雲開明旦須停棹呼兒上釣臺

宿籌嶺

昔日屯兵盛甌閩此地分清時無寇盜比屋樂耕耘  
響不知雨山高都是雲明朝見親舍一笑慰辛勤

送徐君美之六合縣尹

山縣棠梨樹題詩動憶君樽前俱白髮馬首入青雲春



郭千花合秋庭一鶴聞公餘好心事令子已能文

建業清涼寺次王伯循御史竹亭壁間韻

獨尋清涼寺還望翠微亭客散竹間月僧閒松下經江  
聲迴近浦野色到虛庭白髮山中叟為余詩眼青

題吳恭清茂軒

幽尚謝塵牽吳生獨爾賢風泉歎枕外春樹讀書邊舊  
隱懷盤谷新圖出輞川詩僧來往數好句賸能傳

泊戚家堰遇風夜雷雨

高浪出魚龍舟師急捲篷雷聲過雲雨月暈斷河風野  
濶人家外濤喧客枕中坐來搔短髮惆悵大江東

題青山白雲圖

白雲江上頭憶昔似曾遊睡起青山雨坐來紅葉秋深  
苔依逕濕寒磬出林幽亦有高棲者無因見鹿裘

舒嘯軒

幽居蒼林竹永嘯白雲岑自吐虹蜺氣人聞鸞鳳音野  
煙喬木晚江雨落花深亦有東臯興何當一抱琴

至直沽

野灤天低水人家時雨三雁聲連漠北魚味勝江南雪  
擁蘆芽短寒禁柳眼緘持竿吾欲往拙宦向何堪

夜久

夜久未能寐春來空復情遠沙爭月色柔櫓戛河聲客  
枕荒雞到漁歌宿鳥驚隣舟燈火亂早起又詩成

次李參政省中獨坐韻

白髮懷閩嶠丹心戀薊門官閒勝道院宅遠類荒村二

月霜華薄羣山雨氣昏東菑春事及好共野人論

題山水圖

山水坐來得脩然無俗氛碧巖虛夜月江樹靜秋雲鳥影似猶見猿聲疑或聞自憐歸未許遙憶武夷君

荆門閘

車到荆門上舟移鉅野中河聲來汶濟山色見龜蒙楊柳煙深淺杏花春白紅人家桑棗外猶是古人風

過蘭溪

昔過蘭溪上秋風把酒杯  
重來人事異獨立客心哀  
沙合灘聲轉帆移塔影來  
赤松山色近佇望意徘徊

宿黃亭明日四月一日夏至

弛擔沽紅酒開窓挹翠微  
故廬何日到野店送春歸  
雉起麥花落蚕登桑葉稀  
田園有真趣歲晏莫相違

安南即景

龍水南邊去行穿萬竹林  
羊腸山險盡蝸角地蟠深  
銅柱千年恨星槎萬里心  
朝來晴好景綠樹響春禽

送王人傑都事開詔福建

曩客東泉老相逢蓋屢傾劇談消鄙吝高誼動幽明我  
素金門隱君歸錦里耕五年才一見萬里又重行故老  
扶藜拜元戎負劒迎江環螺女浦山盡粵王城麥飯先  
塋感尊羹故國情自憐何日去曝背憇柴荆

夜飲醉歸贈王伯純是日王得容程子初同飲  
歲云暮矣客不樂青雨亭前翫孤鶴城頭愔愔雲下垂  
竹外騷騷雪微作亭中王郎風格奇愛竹愛雪仍愛詩

開樽酒好客更好坐中王程俱白眉紅爐照閣生春霧  
詩思騰騰天外去玉姬舞倦迴風來吹倒三山見瓊樹  
馬蹄蹴響客歸時留我更盡金屈卮塵空祇覺乾坤白  
飲醉不知賓主誰坐聞一聲兩聲折携燈起看竹上雪  
瑤華翠色光陸離人影燈光兩清絕却歸覓紙醉自題  
烏啼古樹風淒淒明年此夜知何處興發還應訪剡溪

題李白問月圖

誰提明月天上懸九州蕩蕩清無煙天東天西走不駐

姮娥鬢霜垂兩肩中有桂樹萬里長吳剛玉斧聲闐闐  
顧兔杵藥宵不眠天翁下視為爾憐頗聞昔時錦袍客  
乃是月中之謫仙帝命和予羽衣曲虹橋一斷心茫然  
竹王祠前霧如雨躑躅花開啼杜鵑月在天上缺復圓  
人間塵土多英賢舉杯問月月不言風吹海水秋無邊  
滄波盡捲金尊裏清影長隨舞袖前相期迢迢在雲漢  
嗚呼此意誰能傳騎鯨寥廓忽千年金薤青瑩垂萬篇  
浮雲起滅焉足異終古明月懸青天



王伯純讀書別墅晨興有懷縱筆奉寄

數日有所思作詩無好趣思君讀書芳桂林睡起題詩  
有新句謝公埭上楝花風密葉啼鶯綠如霧君如塵外  
鶴我似書中蠹人生知己海內稀更有參差不相遇咫  
尺思君知幾回遠別懸知亦良苦草亭新竹長昨夜邛  
溝雨思君持酒時心逐江潮去明年柳暗金河路君馬  
如龍轡如組而今壁上好題詩記取王郎讀書處

答豫章鄧文若進士見贈并謝蘇昌齡徵君

昨日出城風日暄今日雨聲早閉門陰晴百歲手翻覆  
長歌君詩擊我尊昔年之春上京國曉趨閭闔觀朝元  
搏桑出日麗黃道析木聚星環紫垣馮侯作歌君屬和  
我起擊節清心魂五年相望不相見萬事別來難具論  
鬢邊青絲已霜色衣上紅塵惟酒痕瓊花開時廣陵市  
豈意共君同笑言眉山座上爛熳酌三人歡好如弟兄  
縱談夙昔如夢寐仰視明月低崑崙起携數友逐清賞  
雜遝鞍馬城西村江流地上白浩浩山落煙際青渾渾

醉懷磊砢傾欲盡世慮皎潔醒終存覩君佳兒宛在側  
雜佩婉孌紉芳蓀老親稚子隔天末安得不使心憂煩  
感君相寬佩君語期君去我高飛騫飢鴻嗷嗷紛在野  
我曹一飲皆君恩此身倘未溘朝露誓將毫末酌乾坤  
次韻同年李孟函編脩見詒

玉京仙家十二樓真珠垂箔珊瑚鈎錦袍仙人醉吟處  
蟠桃開徧金鰲頭笑予卜居問詹尹江楓搖落霜鴻影  
淮水東邊昔遇君瓊花瀉露金盤冷美人雲髻歌堂堂

白日緩轡迴清光五年相別復相見桂樹蕭颯飛秋霜  
君今青雲致身早笑語從容陪閣老垂鞭曉拂瓊林枝  
抽毫夜視明光草雪風吹酒綠生鱗我起洗濯新豐塵  
會當鳥爪擘麟脯海上一笑三千春

題馬致遠清溪曉渡圖

今晨高卧不出戶歲晏黃塵九達霧美人遠別索題詩  
眼明見此清溪渡溪傍秀林昨夜雨落花一寸無行路  
歌闌桃葉人斷腸艇艇招招過溪去紅日青霞半晦明

白雲碧嶂相吞吐詩成君別我亦歸此景宛是經行處  
舟中順風縱筆呈王子懋縣尹趙德明知事

行舟難逢萬里風同舟難逢兩詩翁長風駕舟似走馬  
詩翁飲酒如長虹三年落魄瓊花月去年躡蹠金臺雪  
美人一笑舞羅衣酒上貂裘雪花熱漳河歸來二月春  
河頭柳色黃金新玉漿浮盃瀉碧酒銀尺出網跳鮮鱗  
平原蒼莽生晚靄上黨飛狐落天外詩成舉酒須飲之  
君看漳河走東海

倦繡篇為雲中呂遵義作

靡蕪葉暗江雲暖翡翠卑飛怨春晚陳女多情玉鏡分  
陸郎薄倖斑駁遠寶鴨團爐百和香錦鴛方褥五文章  
陰陰垂柳籠書幌點點飛花落繡牀雙鸞欲寄金龜倩  
燕月吳雲不相見柔腸萬轉逐迴文亂緒千條縈弱線  
女貞枝上燕雙棲夜合花前思欲迷停針默默無人會  
但覺春山兩葉低曉嘶繡勒門前路夜炙銀燈帳中語  
指點香茸舊唾痕見妾朝朝斷腸處

閩關水吟

閩關之水來隴頭排山下與閩溪流閩關送客東南走  
直到嵩溪始分手客居溪上雲幾重烏啼月出門前松  
天風吹雲數千里飄飄直度長江水清淮浩蕩連黃河  
碧草滿地黃雲多夢中長記關山路隴水潺潺似人語  
覺來有書不得將海潮不上嵩溪陽平原春晚生芳草  
杜鵑聲裏令人老行人歸來動十年潺湲隴水聲依然  
安得湘弦寫嗚咽彈作相思怨明月

題楊予第八港韓氏十景卷

白雪趙君詩句好三年不見心惓惓  
清晨小卷到我前  
萬里江天淨如掃揚州城高雲氣秋  
八公騎鶴時下遊  
焦山丹井夜光歇鐘聲曉入江南洲  
埋輪人去英雄泣  
至今忠憤春潮急枉渚維舟竟日橫  
行人喚渡移時立  
絲絲垂柳鬱金黃渺渺流輝組練長  
殘陽欲沒明月出  
神山二點青螺光港口歸帆如鳥翥  
雪暗江村不知處  
浦寒簑白一漁歸沙淨江清羣雁聚  
金山山前楊子津



舟中來住逐風塵江靈絕景閱之久持似瀟湘江畔人  
草堂無貲髮欲白我與趙子俱為客起來書罷十景圖  
目送飛鷗下江碧

題牧牛圖

返照在高樹歸牛度層坡一犢牟然赴其母老特反顧  
情何多牧兒見之亦心惻人間母子當如何日暮倚門  
烏尾訛

分題蕪城煙雨送吳原哲教諭

蕪城路年去年來自煙雨  
冉冉春濃濕燕絲濛濛曉暗  
迷鶯樹鮑昭愁絕未歸來  
為畫當年斷腸賦登高悵望  
正思君帆影微茫又東去

題米元暉山水

高堂曉起山水入古色  
慘淡神靈集望中冥冥雲氣深  
祇恐春衣坐來濕江風吹雨百花飛  
早晚持竿吾得歸  
身在江南圖畫裏令人却憶米元暉

江南曲

平原萬里莽空濶山過長江翠如潑樓臺高下垂柳陰  
絲管啁啾亂花發北人却愛江南春穹碑城外如魚鱗  
青山江上何曾老曾見南人是北人

題日本僧雲山千里圖

天東日出天西入萬里虬鱗散原隰日東之僧渡海來  
袖裏江山雲氣濕願乘雲氣朝帝鄉大千世界觀毫芒  
却騎黃鵠過三島別後扶桑枝葉老

林志尹秋江漁父圖

江風搖柳雲冥冥小漕釣歸潮滿汀賣魚得錢共秋酌  
白酒船頭青瓦瓶樵青勸酒溪童舞擊甌唱歌無曲譜  
船前野鴨莫驚飛我有竹弓不射汝

喜丁仲容徵君至

題詩苦憶城南郭喜見歸來鶴姓丁雙鬢野風吹汝白  
一燈江雨向人青志士長嗟靈壽杖史官獨失少微星  
瓊花照眼春無賴明日酌君雙玉瓶

送帖僉憲赴山北

大寧城郭枕江雄前代豪華在眼中山外貌貅閨夜月  
海東鷹隼待秋風天圍松嶺雲垂幙霜下金源水若空  
益訪民風上天子勿忘家世是元功

題劉商觀奕圖

松風冉冉羽衣輕石上談碁笑語清樵客豈知人世換  
山童遙指海塵生碧桃開盡又春去白鶴歸來空月明  
一著山中猶未了人間流落不勝情

題廣陵李使君園

最愛燕山李使君名園草木有清芬  
竹光夕度淮南月松色秋連海上雲  
九日登臨來此地百年忠厚見斯文  
酒闌懷我幽棲處松樹蒼蒼猿夜聞

九日與王伯純登蜀崗

帝子樓前紫翠分廣陵秋色起氤氲  
泉涵巴蜀千年月樹入荆吳萬里雲  
宋玉登臨仍送客魏牟流落豈忘君  
明年五岳予真住子有音書當遠聞

橫陽草堂次謝疊山韻

迤邐中州二水回參差傑閣五雲開銀鈎透壁詩人去  
鐵笛裂巖仙客來竹度蟬風涼白恰松翻鶴露瀉清杯  
何時夜半梅花月溪上吟蓬帶雪推

嚴子陵釣臺

故人已乘赤龍去君獨羊裘釣月明魯國高名懸宇宙  
漢家小吏待公卿天回御榻星辰動人去空臺山水清  
我欲長竿數千尺坐來東海看潮生

夜泊獨柳次韻王尹子懋

霽月中天潏絳河黃流滿地漾金波荒陂野火魚漁火  
短棹吳歌雜楚歌去雁已連家信杳閒鷗豈識客愁多  
江南二月花如海獨負歸期奈爾何

送僧遊杭

銅駝夜泣苔花冷銀雁秋飛寶氣消曾共殘僧披舊跡  
尚憐故老話前朝衲隨猿掛雲生樹杯趲鷗還月上潮  
師去新詩如見寄白沙翠篠赤欄橋

高郵



長陂雲氣滿淮東，下隱蛟龍萬仞宮。  
湖岼樓臺連海上，水田杭稻似吳中。  
古藤酒醒春風在，甓社珠寒夜月空。  
四海昇平誰樂隱，賣魚村畔見南翁。

登閩關

獨步青雲最上梯，八閩如井眼中低。  
泉鳴萬鼓動哀壑，山飲雙虹垂遠溪。  
家近尚無鴻雁信，客愁仍有鷓鴣啼。  
書生未老踈狂意，更欲崑崙散馬蹄。

廣陵岳廟登瀛橋同成居竹賦

橋下波光綠染苔橋前岳色翠成堆鶴歸華表空中語  
黿負神洲海上來瓊佩曉趨雲路響琪花秋傍石闌開  
唐家學士今何在勸爾仙人酒一杯

送劉子昭歸杭省親

白魚青笋江南好君去湖山知幾重潮長河船四五尺  
鳥啼門巷雨三松笑予霜點秋來鬢極目雲飛海上峰  
已把行藏付漁釣尚煩書信到疎慵

同王趙二明府行裏河濱

御河行盡一千里望入青齊樹際天野水飛鷗魚舍外  
關山歸雁客帆前月明野氣浮層浪風動川光漾細煙  
客裏未能踈酒醅春來聊復費詩篇

吳門懷古

曾見吳王歌舞時遺臺廢苑不勝悲春風雁唳菰蒲葉  
夜月烏啼楊柳枝有客買舟尋范蠡無人穿塚近要離  
館娃宫外繁花發遊女長歌白紵詞

封川縣次韻典簿牛士良

記取今年重九日封川水驛掛帆過秋風嶺外黃花少  
暮雨樽前白髮多起接野僧談梵典卧聽溪子和蠻歌  
少游欸段成何事畢竟男兒是伏波

烏巖灘馬伏波祠

烏巖江上古祠宮傳是南征矍鑠翁丹荔黃蕉長盛祭  
綠沈金鎖尚英風灘聲夜帶軍聲壯嵐氣秋隨劍氣空  
莫羨少游鄉里好封侯廟食丈夫雄

渡江

幾載途中月窺愁酒半酣送人楊柳色今日是江南

和巴延明善韻

憶踏江南雪看梅領好春酒醒燕月白惆悵未歸人

題小景

雀啁江頭秋稻花顛風吹柳一行斜漁舟細雨獨歸去  
白石滄江何處家

書所見

浦外青山浪作堆淡雲將雨過秋來停舟荻岸西風裏

閒愛野花無數開

次翰林都事拜珠春日見寄韻

日高睡起小窓明飛絮遊絲弄晝晴  
忽憶金河年少夢柳陰騎馬聽流鶯

蘇公赤壁

赤壁江寒葉漸稀黃泥坂靜露斜飛  
洞簫聲裏當時月應照千年化鶴歸

棠梨幽鳥

揚州舊夢隔天涯  
曾醉春風阿那家  
幽鳥豈知人事恨  
依然啼上野棠花

東昌

暖日初抽宿麥芽  
東風吹草綠平沙  
江南老却春多少  
二月東昌見杏花

玉山縣店見壁間黃山林獻可詩次韻

淮水風高雁影微  
澄江潮細鯉魚稀  
客愁正怯江東雨  
花落青林聞棹歸

科舉以滯選法報罷書懷

竹實離離紫海春  
高飛鸞鳳出風塵  
哀鴻不作青冥想  
空向江湖怨弋人

遇故人胡居敬臨江府送至新淦

蚤逐浮榮老未歸  
便歸生事已全非  
人生只合藏名姓  
白首青山一布衣

石倉歷代詩選卷二百八十二



欽定四庫全書

集部

石倉歷代詩選卷二百十

三至  
七

詳校官庶吉士<sub>臣</sub>龍廷槐

侍讀<sub>臣</sub>孫球覆勘

總校官進士<sub>臣</sub>朱 鈐

校對官中書<sub>臣</sub>范來宗

謄錄監生<sub>臣</sub>龐兆懋

欽定四庫全書

石倉歷代詩選卷二百八十三

明 曹學佺 編

明詩初集三

王禕

寄贈中屠教諭

學官本閒曹博士非冗職入存政斯舉道在時乃適卓哉中屠君令閒重珪璧耻隨茂才名羞蹈隱士跡前年

擢鄉書比者承省檄束帶主郡庠橫經擁師席想見百  
里間文風變疇昔大音姑小鳴深蓄那淺測區區抱欣  
慕所恨未良覲願言執麟經與子相叩擊

次韻孫道士思仙

我非世上人所友皆飛仙飛仙亦何為逍遙度遐年飈  
輪朝蓬岳羽駕夕藥淵周遊無停蹤八極及九泉口咀  
三危露手弄五色煙自從墮塵世不復肩期佺念之恍  
如夢使我心茫然何當返初服凌虛恣孤騫

金德元西園宴集得第字

旭日散微暄喬林動清吹雖忻氣候佳頗覺衆芳悴朋  
簪得稍盍客屐隨所憩華年嗟易徂嘉會況難值維予  
二三子夙昔諧深契豈無西掖才未擢南宮第淹時姑  
陸沉誰云果忘世獨憐飄泊蹤萍蓬渺根蒂未知今日  
歡明年復何地

十一月七日出南城別陳三簡討

窮冬朔風怒水霰滿城闌凌晨策我馬言送同心人為

問將安之南轅返江津關河歲已晏胡不少逡巡才高  
世所疾時昌命逾屯鸚鵡適見志畢方動遭文天地亦  
云廣寧不容子身子窮非我憂道在志須伸所憂犯霜  
雪此行多苦辛平生離別淚為子一沾巾相期有後日  
甌勉豎經綸

贈別彭仲愈分得水字

平生喜求友結託盡名士英遊非不多落落鮮知己夫  
君文章伯問學富經史大器須晚成至寶不輕市相逢

吳會間論議發蒙鄙未會神先交遽別情曷已蕭條歲  
云徂飛雪徧千里江寒蟄魚龍路遠積煙水離異未足  
嗟合并寧可擬獨懷同門朋為我謝屠子

十二月二十一日同堵無傲朱伯言郭公葵過  
西湖至南山余將渡江東歸賦此留別

北風有餘淒衆卉無留芬寥寥湖山際清遊接歡欣嗟  
我二三子平生歷多辛天道諒非遠如何久遭迍幸茲  
稍憇息頗覺忘趨奔感今長慨積道舊鬱懷伸世情日

已變友誼古所敦歲晏各自愛毋徒惜臨分

秋夜雙溪上對月懷故人

秋氣日已肅秋夜日已長蕭然清溪上對此明月光月  
雖照我身豈能知我心我心亦何為所思在所欽嗟君  
玉雪姿與我同心期此月若照君君能不余欺

十一月五日重登南溪蔣氏懷遠亭

石逕融積霜桐檐散霏煙良辰攜佳友登覽思悠然青  
山如故人歷歷揖我前獨憐亭前松歲晚含清妍昔至

始過膝今來已齊肩撫物動深慨人生無百年浮華易  
衰謝流序倏徂遷不朽或可託吾將企前賢

至正戊戌三月卜居青巖與同志分得行字

窮年困廛市愛此山中行出郊步稍遠入林懷已清天  
地正逼仄歲月方崢嶸卜居樂深境歛迹逃浮榮久矣  
采薇曲非歟浣花名肥遯豈初志冥栖亦真情竚諧松  
筠契敢負猿鶴盟澄茲雙澗水可以濯吾纓歲晏倘可  
託於焉寄平生



南康郡齋

承恩紆郡紱服職効官箴秩厚幸粗給力孱非所任雖  
忻民訟簡恒恐吏議侵殘氓既摩撫宿蠹亦搜尋此邦  
乃名郡經變已年深荆榛猛獸處瓦礫悲蟲吟道院存  
故號公庭蔽荒陰前瞻彭蠡澤後揖匡廬岑緬懷昔朱  
子遺愛在人心往軌儻可踵吾將自茲今

長安雜詩

自昔天子宅雄麗稱長安右瞻控隴蜀左顧俯河關清

渭北據水太白南聯山其間八百里陸海莽平川神皋  
奠天府風氣固以完周家本仁厚國統最綿綿漢唐能  
樹德亦復祚脣延秦隋秉靈政二世即傾顛在德不在  
險古語諒弗謬嗟余異代後遺跡已茫然

其二

我行咸陽野但見多墳塋大者王與侯小者猶公卿隧  
前無碑碣莫得知姓名想當在世日貴富臻顯榮賞罰  
自其口語出神鬼驚焉知百歲後泯然無所稱累累一

坏土僅與螳垤并  
聖否共湮沒後人為傷情

其三

秦皇併六國漢武開西方  
兵威如雷電滅戮皆暴強功  
成無所欲但欲年壽長  
樓船往東海仙劑求扶桑  
金盤出雲表沆瀣承天漿  
盼睐蓬萊藥舂醴瑤池觴  
終然乖所覲日夕徒遑遑  
坡陀驪山下零落茂陵旁  
至今行路者佇立為徬徨

其四

崔嵬終南山形勢甚磅礴西來挾崆峒東亘聯華嶽長  
雲覆重巒紫翠入寥廓杞梓產深林龍蛇蟄幽壑淑靈  
之所鍾宜有異人作如何千載間蹤跡轉蕭索姬且不  
復生三代已云邈後來王佐才勞予思景略

其五

人生百年中窮通無定迹譬如風前花榮謝亦頃刻當  
時牧羊豎尊貴今誰敵顛顛種瓜翁乃是封侯客丈夫  
苟得時糞土成拱壁一朝恩寵衰黃金失顏色古昔諒

皆然今我何歎息

雜賦

梧桐生巖陽下俯清澗潄柯葉雨露滋鳳凰宿其陰稟  
材一何良裁作綠綺琴被以絃朱絲綴以徽黃金澹然  
三尺中實涵太古心唐虞世已遠末代崇哇淫匪無南  
風曲欲鼓誰知音

其二

終朝飲醇酒舉杯易成醉終日讀古書撫卷不成寐義

理一何深歲月一何駛功名實外物山林乃吾事昨夜  
西山雲秋雨生爽氣笑指二尺檠終當勿相棄

其三

門前兩松樹千尺何青青白雲枝間宿縹緲姿態生驚  
飈來吹拂復作笙竽聲物情豈有適偶爾相合并須臾  
遂分散彼此各無情因之感世故超然欲忘形

家居

家居華川上及此三百齡老桂蔽後堂長槐列前庭槐

陰夏散綠桂花冬留青重惟根本茂枝葉藉以榮吾先  
久種德嘉種乃休徵撫躬良自愛遺蔭庶其承

又

東隣職胥史西隣業屠沽酒炙日狼籍錢財肆求需口  
體既華飽自謂樂有餘寧知生死間身與糞壤俱鄙人  
有遠志屢空非所虞閉門卧風雨窮年理詩書所憂道  
未至不得成名譽修名倘樹立千載以為圖

常熟西郊

稻禾歛嘉實蘭蕙摧孤芳華滋日已歇遊子多慨慷林  
臯集鳥雀畎畝散牛羊物情各有適心與歸雲翔

簡分水明惟一監縣

分水百家邑民安俗事閒驅雞聊作吏騎馬稱看山劒  
倚萍花冷詩題柿葉斑秋風一杯酒及此慰朱顏

吳江別蓮上人

飄零有若此離別復如何情割酒杯少愁添詩句多荒  
村黃葉樹極浦白鷗波回首相攜處秋風瑪瑙坡



送管教諭之官遂昌

聞說遂昌縣青山繞郭多民居  
時間樹學舍止依坡春雨香  
芹藻秋風冷薜蘿遙知講經暇  
高興託絃歌

贈別汪先輩歸永嘉

憐君負才藝命與壯心違  
回首已華髮半生猶布衣  
山空芳草歇海濶蟄龍稀  
歲晚東陽道含悽賦式微

九日同劉敬思黃彥美登蕭然山

身世真如寄登臨得及時  
地高風起急天迥日沈遲  
綠

鬢欺紗帽黃花照酒卮不知陶靖節歸去亦何為

全許一秀才宿山館

山家偶同宿邂逅覺情多世故政如此人生能幾何涼  
風侵白苧暮雨濕青蘿且盡今宵酒乘酣發浩歌

春日繡湖上與德元同行

十里華川上年來足勝遊雨花林下寺風柳驛邊樓漠  
漠芙蓉浦依依杜若洲平生身外事未許付浮鷗

題溪山風月樓

城南遺跡舊復此構新樓山色風餘淨溪聲月下幽華  
裾時共接紅粉任遲留寄語登臨者無詩莫謾遊

送許時用歸越

舊擢庚寅第新題甲子篇老來諸事廢歸去此身全煙  
樹藏溪館霜禾被石田鑑湖求一曲吾計尚茫然

臨洮書事

此郡臨邊塞時平不戒嚴民居蕃漢雜僧語梵唐無翠  
石堪磨研鹹泉食當鹽秦城何處是日暮動遐瞻

重到蘭州

重到蘭州境吟魂覺暗消  
驛程遲倦馬春氣動垂貂  
塞雪昏藏寇河水凍解橋  
將軍誰得似一一漢嫖姚

秦州

水積從天降山連與蜀通  
遺碑李廣宅廢寺隗囂  
宮度隴遲迴際遊秦感慨  
中長憐少陵老曾此嘆途窮

贈別高彥清憲郎

相見即相別其如念子何  
汧雲隨晚騎隴樹照春羅  
仕

金分日人全言 卷二百八十三  
志青霄遠寓吟白雪多重逢定何地關下聽鳴珂

題九江秀色圖

昔聞廬山謠今見廬山高廬山之高幾萬仞九江秀色  
不可招山南山北盡佳致五百僧房紛點綴香爐直削  
金芙蓉瀑布長拖青翡翠晴嵐暖靄日夕浮畫圖彷彿  
不得求謫仙仙去二千秋安得起爾從之遊

留別陳秀才

百里春帆到海隅不堪回首拂征裾少年未慣長為客

有便相煩數寄書  
言子絃歌遺化在  
吳王城塹却灰餘  
英游從此成疎濶  
後夜懷君月上初

贈別楊巡簡之嵯縣

西陵渡口發征鞍  
去旆蕭蕭二月寒  
雲斷蘼蕪連驛路  
雲晴瀾瀾落沙灘  
客懷儘向樽前遣  
山色疑多馬上看  
莫向剡溪懷舊蹟  
從來高士寄微官

過濟州城南

蒼茫煙火雜風沙  
商館民廬一萬家  
橋上朱欄人繫馬

門前綠樹日藏鴉  
州名近為災年改  
士俗猶將俠氣誇  
闕里蒼蒼空在望  
客程相促又登車

桐廬舟中

瀟灑溪山夢此邦  
輕風細雨過桐江  
川迴幾訝船無路  
林缺時看屋有窓  
野果青包垂箇箇  
川禽白羽去雙雙  
到家正是重陽節  
新釀村醅正滿缸

贈別晉秀才

逆旅論交未一年  
匆匆為別覺淒然  
官河去棹多春水

故里歸耕有石田名姓不從當世顯文章可得後人傳  
多才還射君門策遲子重來住日邊

吳江客中冬至日

十年奔走竟何為轉覺謀生事事非時序每驚愁裏換  
家山長向夢中歸吳江歲晚寒波積楚塞天邊鴻鴈稀  
醉後登樓倍惆悵緇塵猶滿舊征衣

次韻朱一中新正試筆

甲午元正逢甲子也知人事合天時頒春喜見新年歷



問竹猶看舊日枝香散屏圍煙陣陣雪消簷溜雨絲絲  
承平氣象今行見定復重歌既醉詩

禽言次王季野韻

力作力作人言田家樂誰識田家苦養蠶一百筐種田  
一百畝田蠶非無收不了輸官府但願官府不我虧田  
家力作非所辭

脫袴脫袴人情憐新不憐故故袴綿所粧新袴但裁布  
薰風四月天微炎人人著布便脫綿綿袴非不完失時

誰是憐

行不得哥哥乾坤滿眼紛干戈荆湖骨如丘江淮血成  
河道路斷絕可奈何君行將何之欲投遼東去却向海  
上過行不得哥哥海水寧可測只今平地皆風波

江上曲

木蘭船繫門前樹阿郎今朝掉船去去時為問幾時歸  
約道歸時日須暮江上風水不可期日暮君歸那得知

南康書事

五峯出青穹宛若金芙蓉日射光燦爛雲生氣鴻濛誰  
其凌絕頂笙鶴駕長風

山前雨瀑流勢欲翻萃律銀河九天傾玉峽雙龍出六  
月幽壑間陰風動蕭瑟

言尋白鹿洞欲訪紫陽翁一溪浸山月萬壑號松風前  
哲不可及悵望將焉從

臨湖作幽亭湖光淨如鏡仰觀雲翼翔俯覽淵鱗泳景  
會樂自生悠然孰吾競

郡廨新落成繁木蔭階屺稍欣吏牘稀粗覺民事理簷  
雀不相猜羣飲硯池水

古人樂吏隱所貴性有適著述本吾事催科豈其職拙  
哉彭澤翁惆悵為形役

贈別毛先輩

赤日黃塵徧九垓故山無日不興懷西溪精舍君歸看  
書帶春深綠繞齋

贈穆生之任崇德

江花江水思冥冥，百里征帆帶曉星。  
欲託東風將別意，驛亭無許柳條青。

寄陳子雋憲郎

一月不見陳公子，便覺令人鄙吝生。  
秋風白蘋已可采，幾日芳洲攜手行。

春早漫興

洩雲漏日淡無光，薄暖輕寒互送將。  
醉眼莫嫌春色淺，東風新染柳絲黃。

漫興

天邊消息杳無期  
獨立蒼茫有所思  
總說梅花春意早  
幾時還到北邊枝

客窓

客窓風雨夜沈沈  
形影淒然獨擁衾  
只有青燈如骨肉  
寂寥相伴到更深

荆門曲

任城北行三百里  
官樹如雲夾河水  
樹深水淺船行遲

五日纔到荊門西

又

荊門津吏不開牒前船後船如山壓名驅利逼貪塗程  
落月在地登車行

石倉歷代詩選卷二百八十三